


LAREM PA BURA GIN KI OYO



Ododo na ni yoo?
Eyoo.

I kare macon onongo tye lee aryo ma gin lurem mada. Lurem man obedo Bura gin ki Oyo, gibedo
iot acel, ma jami ducu gitimo kacel. Ma gin lurem ma tek atika atika.



I kare ma kot dong opoto, kare

oromo me pur. Ci Bura gin ked Oyo gubedo piny kacel.

Bura owaco ni, "Jal Oyo, kare dong oromo me pur. Omyero wa pur poto kacel."
Oyo ogamo ni "An bene aye."

Oyo gin ked Bura gupuru poto kacel ma cwinygi yom kum gin ma gutimo. Lacen Oyo owaco ki Bura ni "Jal Bura, poto wa ma wapuruni omyero wa coo iye kodi ngor."


Bura pe okwero tam pa Oyo. Bura owaco ni "Oyo itamo tam ki kome."




Joni gucoyo kodi ngor i poto ma otwii mabeco
tutwal, onyak madwong atika atika.

I kare ma ngor otwor maber, gupwono kacel,
guketo idero acel ma opong maber.


Bura owaco ki Oyo
ni "Jal, ngor man
ber pe kong wacam.
Omyero okur kare
ma kec opoto ka
wacak camone."
Oyo ogamo ni"
Lokki ni ada pien
kec rac atika atika.
Omyero ngor man
kong okur kare me
kec."




Kitung cel Oyo obedo ladingo pe
olubo cike man pien
onongo mito ni
ebwol lawote
Bura woko, wek
ecam ngor man
kene. Pi kur pa
ngwec ngor,
Oyo odonyo
idero ocako
kwalo ngor
man ma Bura
pengeyo.



Ikare ma Bura mito ni ngor man dong gi kwany
gi cak camone pien kec dong opoto, kinongo gin
mo dong pe i dero. Bura onongo Oyo ocamo ngor
woko weng! Odong cung ngor keken idero.





Bura okeco matek tutwal ikom Oyo, ma Bura omito ni emwod iye Oyo woko pien gin me acama onongo dong peke. Ci Oyo onguku ngeyo kome oringo madwir okane woko i bur kama Bura pe romo oo iye.

Ma Bura okeco atika atika dok okeco ci okeco
omiyo Bura okwonge ni “Nicake tin nioo iwang too
na, abibedo lamone ni, abi mwodo in, lotino ni wa
lukwayi ducu. Abiyenyi ka ma i kane iye wang ma
anongi. Ka iwinyo koko na ni miaao, miaao, miaoo
nongo atye ka yenyi.”



Oyoo bene okato ki lok lacen ni "Pe abibedo ma wiya wil ikumi, abikane ma pe i binongo wan ki lotinona, abibedo cok kama ikwo iye dok abigolo ot ma ikwo iye, dok anywal dok anyar iye. Ka iwinyu akok ni cwii cwii cwii nongo atye ento pe i bi nonga."

Omiyo i kare ni Bura gin ki Oyo gin lumone pe girwate.

Pwony:

Ododo man pwonyo wa ni, kwo rac, kelo too nyo
poke.

Cikke myero ki wor dok kilub.




Written by:

Okello Augustine	P2 Teacher Amuru Alero P/S
Laker Everline	P1 Teacher Koch Amar P/S
Otto Kennedy	P2 Teacher Cwero P/S
Jokpiny Coxton	P2 Teacher Koch Goma P/S

Literacy and Adult Basic Education (LABE)

Plot 18 Tagore Crescent, Kamwokya,
P.O. Box 16176, Kampala, Uganda.
Tel:+256-41-532116, Fax:+256-41-534864,
Email: labe@africaonline.co.ug

LAREM PA BURA GIN KI OYO



Produced by
Literacy & Adult Basic Education

With financial support from DFID and Oxfam Novib

READERS' BOOK